

आकाशवाणी

खबरां -----

1. प्रधानमंत्री नरेंद्र मोदी होरें आखेआ जे भारत ते साइप्रस आपसी ते इनें जनेई सोच जरिये वैश्विक शांति ते टिकाउपन आस्तै योगदान दिंदे न, साइप्रस राष्ट्रपति निकोस क्रिस्टोडाउलाइड्स हुंदे कन्नै प्रतिनिधिमंडल स्तर दी गल्लबात च दपक्खी रिश्ते दी कीती समीक्षा।
2. प्रधानमंत्री नरेंद्र मोदी होरें साइप्रस दे सब्बनें शा उच्चे नागरिक सम्मान “ग्रैंड क्रॉस ऑफ द आर्डर ऑफ मैकारिओस थर्ड” कन्नै सम्मानित कीता गेआ।
3. गुजरात च अहमदाबाद ब्हाई ज्हाज क्रैश होने करी जान मुहाने आहले लोकें चा 99 डी.एन.ए सैंपल मैच कीते जाई चुके देन।
4. देश च 16मीं मरदमशुमारी 2 चरणें च करवाई जाग, शुरूआत पहली अक्तूबर 2026 गी होग।
5. केंद्री गृह मंत्री अमित शाह होरें आखेआ जे आपदा प्रबंधन दे क्षेत्र च भारत वैश्विक गुरु बनने दी बत्त पर अगगे बदा'रदा ऐ।
6. बीजेपी नै कर्नाटक च कांग्रेस सरकार तरफा दोबारा राज्य च जाति आधारित मरदमशुमारी कराने दे फैसले गी लेइयै कांग्रेस गी निशाना बनाया।

<><><><><><>

प्रधानमंत्री नरेंद्र मोदी होर साइप्रस दे राष्ट्रपति निकोस क्रिस्टोडाउलाइड्स हुंदे कन्नै निकोसिया च प्रतिनिधिमंडल सतह दी गल्लबात करा'रदे न। एहदा मकसद दपक्खी रिश्ते दी नजरसानी करना ते बपार, निवेश, नवीनीकरण जेह क्षेत्रें च आपसी सहयोग दी नमीं संभावना तलाश करना ऐ। क्षेत्रीय ते वैश्विक मुद्दे जिंदे च भारती यूरोपीय संघ रिश्ते ते भारत मध्य पूर्वी आर्थिक गलियारा बी शामिल ऐ, बी चर्चा दा हिस्सा रौहग।

<><><><><><>

Cypress-PM Talk

प्रधानमंत्री नरेंद्र मोदी होरें भारत साइप्रस सांझेदारी गी मजबूत दस्सेआ जेड़ी प्रजातांत्रिक मुल्लें दे कनून पर आधारित ऐ। उनें आखेआ जे दवें देशें बश्कार दोस्ती हालातें ते बन्ने कन्नै नेई जुड़ी दी ऐ परीक्षा दे समें बी बरकरार ऐ। मोदी होरें एह गल्ल साइप्रस दे राष्ट्रपति निकोस क्रिस्टोडाउलाइड्स हुंदे कन्नै निकोसिया दे Presidential पैलेस च मीडिया गी संबोधित करदे होई आक्खी। उनें आखेआ जे साइप्रस दा 2035 दा ते भारत दा विकसित भारत 2047 दे रेड्यै च बड़ा किश इक जनेआ ऐ ते दवें देशें बश्कार सांझेदारी दा भविष्य तय करने आस्तै अगले 5 बरें लेई रोडमैप तैयार कीता जाग। मोदी होरें साइप्रस गी औने आहले यूरोपीय संघ दी Presidency आस्तै शुभकामनां दित्तियां ते यू.एन सुरक्षा परिषद च भारत दी स्थाई सदस्यता आस्तै सहयोग देने दा सोआगत कीता।

<><><><><><>

PM Honour

प्रधानमंत्री नरेन्द्र मोदी होरें'गी साइप्रस दे सब्भनें शा उच्चे नागरिक सम्मान "ग्रैंड क्रॉस ऑफ द ऑर्डर ऑफ मकारियोस थर्ड" कन्नै सम्मानित कीता गेआ ऐ। एह सम्मान प्रधानमंत्री मोदी होरें'गी निकोसिया

दे राष्ट्रपति भवन च इक बशेश समारोह दे दरान उत्थुं दे राष्ट्रपति निकोस क्रिस्टो-डोलीडीज होरें भेंट कीता। साईप्रस दे पैहले राष्ट्रपति आर्क-बिशप मकारियोस थर्ड हुं'दे नांऽ पर दित्ता जाने आह्ला एहू सम्मान, राष्ट्र अध्यक्षें ते आलमी सतह दे नेताएं गी उं'दी असाधारण उपलब्धि ते जोगदानें लेई दित्ता जंदा ऐ। इस सम्मान पर आभार व्यक्त करदे होई प्रधानमंत्री नरेन्द्र मोदी होरें आखेआ जे एहू छड़ा उं'दा नेई सगुआं भारत दे 140 करोड़ लोकें दा सम्मान ऐ। श्री मोदी हुं'दी एहू यात्रा साइप्रस च पिच्छले द'उं दहाकें च कुसै भारती प्रधानमंत्री हुं'दी एहू पैहली यात्रा ऐ।

<><><><><><>

Iran-Israel Conflict

ईरान-इस्राइल दे बशकार बददी तनोतनी चौथे दिन बी बरकरार ऐ। लगातार मिसाइल हमले करी कई लोकें दी मौत होई गई ऐ ते दौनें देशें च खासी तबाही होई ऐ। पूरी राती चले दे अवरोध च 100 नागरिक घायल होए न जेड़ा गै इस्राइल खिलाफ तेहरान बक्ख्य लगातार विरोधी गी उजागर करदा ऐ ते ईरान दी न्यूक्लियर सुविधां ते बैलिस्टिक मिसाइल कार्यक्रमें गी निशाना बनाया जा'रदा ऐ। विश्व नेता कनाडा च जी.टी समिट लेइयै बुलाए गेदे न, पर दुई बक्खी पच्छमी एशिया च जंग दा ,खतरा बी बने दा ऐ। ईरानी मिसाइलें सोमवार बडुलै मूंह नहेरे तल तवीव ते हायफा दे बंदरगाह शहर गी निशाना बनाया जेदे च मकान तबाह होई गए ते मरने आहलें दी गिनतरी 18 तोड़ी पुज्जी गई ऐ। इस तनोतनी च अजें तोड़ी 240 लोक मारे गेन।

<><><><><><>

UK-Intelligence

ब्रिटेन दी विदेशी खुफिया एजेंसी एम-16 दा नेतृत्व पहली बारी इक महिला करने जा'रदी ऐ। अपने 116 बरें दे इतिहास च एहू पैहली बारी होआ'रदा ऐ। Blaise Metrewali, जेड़ियां खुफिया सेवा

कन्नै 1999 कन्नै जुड़ियां हियां, हुन इस संगठन दी 18मीं मुखिया बनंगन। Metrewali मौजूदा समें च एजेंसी च तकनीकी ते नवीनीकरण क्षेत्र दिक्खारदियां न। प्रधानमंत्री Keir Starmer होरें इस नियुक्ति गी ऐतिहासिक दस्सेआ कीजे मौजूदा हालातें गी दिखदे होई स्हाड़ी खुफिया एजेंसिएं दा कम्म एहदे शा पहले कदें बी इन्ना महत्वपूर्ण नेई हा।

<><><><><><>

DNA-Samples

अहमदाबाद ब्हाई ज्हाज क्रैश मामले च गुजरात च अज्जै तोड़ी 99 डी.एन.ए सैंपल्स मैच करी लैते गेन। इन्दे चा 64 लोथां रिश्तेदारें दे हवाले करी दित्तियां गेइयां न। सिविल अस्पताल दे अतिरिक्त सुपिंर्स्टेंडेंट डॉ. रजनीश पटेल होरें आखेआ जे जिंदे डीएनए मैच होई चुके देन, उन्दे परिवारें गी जानकारी देई दित्ती गेई ऐ। अज्ज बडुलै तोड़ी 13 लोक लोथां लैने लेई आई चुके देन।

<><><><><><>

Mortal-Remains Rupani

डी.एन.ए मैच करने मगरा अज्ज गुजरात दे साबका मुख्मन्त्री विजय रूपाणी हुंदी अस्तियां हुंदे परिवार गी सौंपी दित्तियां। 12 जून गी होए दे ब्हाई ज्हाज क्रैश च रूपाणी हुंदा काल होई गेआ हा। परिवार अस्तिएं गी लेइयै राजकोट गेआ। अंमित संस्कार शामी 5 बजे कीता गेआ। विजय रूपाणी होर 2016 थमां 2021 तोड़ी गुजरात दे मुख्मन्त्री रेह।

<><><><><><>

Census

सरकारै अज्ज देसै च मरदमशुमारी कराये जाने दी अधिसूचना जारी करी दित्ती ऐ। गृह मंत्रालय पास्सेआ जारी कीती गेदी इक अधिसूचना च आखेआ गेआ ऐ जे मरदमशुमारी लेई संदर्भ तरीक पैहली मार्च 2027 होग। केंद्रशासित प्रदेश लद्दाख ते जम्मू-कश्मीर दे बर्फीले इलाकें सने हिमाचल प्रदेश ते

उत्तराखंड लेई एहू तरीक लागू नेई होग। लद्दाख, जम्मू-कश्मीर, हिमाचल प्रदेश ते उत्तराखंड च मरदमशुमारी पैहली अक्तूबर 2026 थमां करोआई जाहंग। एहू भारत दी 16मीं राश्ट्रीय जनगणना होग ते मुल्ख दे आजाद होने दे बाद 8मीं मरदमशुमारी होग। एहदा कम्म द'उं चरणें च तोढ चाढेआ जाहंग ते एहदे च जातिगत गणना बी शामिल होग।

<><><><><><>

Plane Crash committee

अहमदाबाद ब्हाई ज्हाज क्रैश दी जांच गी लेइयै सरकार तरफा गठित उच्च स्तरीय कमेटी दी पहली बैठक अज्ज दपहरी नमीं दिल्ली च होई। इस कमेटी दी अध्यक्षता केंद्री गृह सचिव होर करडन। इस उच्च स्तरीय कमेटी च सिविल हवाबाजी मंत्रालय दे सचिव, गृह मंत्रालय दे वरिष्ठ अधिकारी, अहमदाबाद दे पुलिस कमिशनर, भारती वायु सेना च जांच ते सुरक्षा दे डरैक्टर जनरल ते सिविल हवाबाजी सुरक्षा ब्यूरो दे डरैक्टर जनरल शामिल न। एहू कमेटी अपनी रिपोर्ट 3 महीने दे अंद जमा करोआग।

<><><><><><>

WPI

भारत दा थोक मुल्ल सूचकांक पर आधारित महंगाई 14 महीने च सब्बनें शा घट्ट यानि 0.39, प्रतिशत मई च 0.85 प्रतिशत, अप्रैल च रिकार्ड कीता गई। उद्योग ते वाणिज्य मंत्रालय दे मताबक खाने-पीने आहली चीजें दी महंगाई 2.55 प्रतिशत थमां घटिए 1.72 प्रतिशत होई गई ऐ।

<><><><><><>

HM-Disaster

केंद्री गृह मंत्री अमित शाह होरें राज्य राहत कमिशनरें गी आखेआ ऐ जे अगले 90 दिनें च हर जिले आस्तै जिला आपदा प्रबंधन योजना तैयार कीती जा। नमी दिल्ली च अज्ज राज्यें ते केंद्र शासित प्रदेशें दे रिलीफ कमिशनर दे सम्मेलन गी संबोधित करदे होई शाह होरें आखेआ जे आपदाएं बेल्लै प्रतिक्रिया देने आस्तै जिला स्तर पर आपदा प्रबंधन योजना होना लाजमी ऐ। उनें आखेआ जे सरकार बगैर कुसा जानी नुकसान दे आपदा प्रबंधन दा कम्म करारदी ऐ। पिछले 10 बरें च क्षमता, कारकरदगी, तेजी ते पूरी चाल्ली सेही प्रतिक्रिया देने दे क्षेत्रें च महत्वपूर्ण उपलब्धियां हासल कीतियां न। अमित शाह होरें आखेआ जे मौसम बदलाव ते बददे तापमान करी पूरी दुनिया आपदाएं गी लेइयै चिंतित ऐ।

<><><><><><>

Army-JK

जम्मू-कश्मीर केंद्र शासित प्रदेश च भारती फौज नियंत्रण रेखा पर सीमाएं दी राखी करने, आपदाएं दौरान मदद लेई पुज्जने, आतंकवाद रोधी कारवाइएं च सहयोग देना, बन्ने पारा घुसपैठ ते थेआरें ते नशीले पदार्थें दी तस्करी रोकने दे अलावा कई समाजी कम्में च बी बधी चढियै हिस्सा लैदी ऐ। आपरेशन सद्भावना तैहत कीते जाने आहले फौज दे कम्म-कारवाइएं कन्नै लोकें गी टकोहदा करियै बन्ने कन्नै लगदे दूर इलाकें च मता फैयदा पुज्जा'रदा ऐ। आपरेशन सिंदूर तैहत पुंछ जिले दे श्री कृष्ण चंद्र डिग्री कालेज पुंछ च फौज नै इंडोर बैडमिंटन हाल दी मरम्मत करियै इसी नमे सिरेआ सोआरने दा कम्म मुकम्मल करी लैता ऐ जिसी इक सादे समारोह दौरान औपचारिक तौरा पर कालेज दे सुपुर्द कीता गेआ। इस मौके 93 इन्फेंटरी ब्रिगेड दे कमांडर ब्रिगेडियर मुदित महाजन, जिला विकास कमिशनर विकास कुंडल ते अतिरिक्त पुलस सुप्रिंटेंडेंट मोहन शर्मा बी मजूद हे। फौज आसेआ बैडमिंटन हाल सौंपे जाने दे बाद उत्थे इक दोस्ताना मैच बी खेड्ढेआ गेआ।

<><><><><><>

BJP-Karnatka Govt.

बी.जे.पी नै कांग्रेस दी सरपरस्ती च चला'रदी कर्नाटक सरकारा पर राज्य च परतिए जाति पर आधारित मरदमशुमारी कराने दे फैसले लेई निशाने पर लैता ऐ। नमीं दिल्ली च मीडिया गी संबोधित करदे होई वरिष्ठ बीजेपी नेता ते केंद्री मंत्री भूपेंद्र यादव होरें आरोप लाया जे कांग्रेस आस्तै ओबीसी यानि अन्य पिछड़े दे वर्ग दे लोक सिर्फ वोट बैंक न। उनें कर्नाटक सरकार थमां पुच्छेआ जे पहले बी जाति आधारित मरदमशुमारी पर 165 करोड़ रपे खर्च कीते गे हे ते इस सरकारी पैसे दी बर्बादी दा जिम्मेदार कौन ऐ। मोदी होरें बी कांग्रेस पर आरोप लाया जे ओहू म्हेशा ओबीसी समुदाय गी धोखा दिंदी आई ऐ ते जेकर पार्टी उन्दे हितै गी लेइयै गंभीर ऐ ते Kaka Kalelkar Commission मगरा होर कोई कमिशन गठित की नेई कीता गेआ।

<><><><><><>

LG-Passing Out (byte)

लेफ्टिनेंट गवर्नर मनोज सिन्हा होरें अज्ज आखेआ ऐ जे जम्मू-कश्मीर दी धरतै थमां आतंकवाद दा समूलचा नास करना उंदी सभ्भनें शा बड्डी प्राथमिकता ऐ। उ'नें आखेआ जे जम्मू-कश्मीर पुलस इक मता व्यापक नजरिया अपनांदे होई खूफिया एजेंसिएं, समुदायें, अज्जै-कल्लै दिएं तकनीकें ते बक्ख-बक्ख एजेंसिएं दे साथ-सैह्योग कन्नै इस दिशा च अगगे बधना लोड़चदा ऐ। श्री सिन्हा होरें एहू गल्ल अज्ज उधमपुर दी शेरे कश्मीर पुलस अकैडमी च सखेत्रु डीएसपी-एं दे 17में बैच ते सखेत्रु सब-इंस्पेक्टरें दे 26में बैच दी पासिंग आउट परेड गी संबोधित करदे होई आखी।

<><><><><><>

Health-Facilities-SANJY

सेहत मंत्री सकीना इत्तू होरें आखेआ जे 3 जुलाई थमां शुरू होआ'रदी श्री अमरनाथ दी जात्तरा दौरान श्रद्धालुएं लेई सेहत सरबंधी सब्बै स्थूलतां, दस्तयाब करोआइयां जाडन। सेहत मंत्री होरें सोनमर्ग दा दौरा लाइयै उत्थे मेडिकल स्थूलतें दी उपलब्धता दा तफसीली जायजा लैता। उन्दे कन्नै कंगन थमां विधायक मियां मेहर अली ते होरनें आला अधिकारी बी मौजूद हे। मीडिया आहलें कन्नै गल्ल करदे होई मंत्री सकीना इत्तू होरें गलाया जे सरकार पूरी रमानदारी कननै श्रद्धालुएं गी मेडिकल सुविधा उपलब्ध करोआने लेई बचने बज्झी दी ऐ तां जे जाततरा गी बवस्थित ढंगै नै तोड़ चाढोआ जाई सकै।

<><><><><><>

Dharti Abha-Doda

जिला प्रशासन डोडा नै धरती आबा जनभागीदारी अभियान तैहत अज्ज टाउन हाल डोडा च इक विशेष जागरूकता शिविर दा आयोजन कीता। डिप्टी कमिशनर हरविंद्र सिंह होर जेडे इस कार्यक्रम च मुख्ख परौहने दे तौरा पर शामिल होए। उनें भगवान बिरसा मुंडा होरें गी श्रद्धांजलि अर्पित कीती ते आखेआ जे जनजातीय समुदाय दे पूरे-पराते विकास गी यकीनी बनाने लेई बेहतर ढांचागत स्थूलतां जिआं जे शिड़कां, सेहत सुविधां, शिक्षा ते होर दुइयें स्थूलतें गी बेहतर बनाना लोडचदा ऐ तां जे समावेशी विकास यकीनी कीता जाई सकै। डी.सी होरें जानकारी दित्ती जे बक्ख-बक्ख योजनाएं तैहत 15 जनजातीय ग्राएं दी पंछान करी लैती गेदी ऐ। तुआई, रामबन जिले च बटोत तहसील दी चकवा पंचैत च बी इस्सलै जारी 15 रोजा धरती आभा जन भागीदारी अभियान तैहत इक जागरूकता कैप दा सरिस्ता कीता गेआ। इस मौके पर बक्ख-बक्ख मैहकमें थमां माहिरें गद्दी जनजातीय समुदाय दे लोकें गी सरकार आसेआ चलाई जा'रदी बक्ख-बक्ख योजनाएं बारै जानकारी दित्ती ते उन्दे आसेआ पुट्टे गेदे मसलें गी बी सुनेआ ते किश दे मौके पर गै नबेड़ा बी कीता गेआ।

<><><><><><>

IMD

भारती मौसम विभाग नै तटीय कर्नाटक कोंकण ते गोआ दे किश इलाकें च मती थमां खरी मती बरखा पौने दी मेद जताई ऐ। छत्तीसगढ, गुजरात, केरल ते उत्तर पूर्वी राज्यें च बी अगले 2-3 दिनें दौरान शैल बरखा पौने दी पेशगोई कीती गई ऐ। डॉ. जेनामनी होरें जोड़ेआ जे भारत दे कुसा बी हिस्से च मानसून च कोई बाद्दा नेई होआ ऐ, मगर कोंकण, गोवा ते तटीय कर्नाटक च खरी मती बरखा पेई सकदी ऐ। उनें आखेआ जे मते सारें इलाकें च तापमान 40 डिग्री सेल्यिस शा घट्ट या सामान्य रौहगा।

<><><><><><>